

## Ա. ԱԲԵՏԱՐԱՆ

Յովհաննէսի Համաձայն (13:21b-14:4)

Մեր Տէրը Յիսուս Քրիստոս Կ'ըսէ՝

- Լա՛ւ գիտցէք, թէ ձեզմէ մէկը պիտի մատնէ զիս:

Աշակերտները իրարու կը նայէին, շուարած՝ թէ որո՞ւն համար կ'ըսէ: Աշակերտներէն մէկը, զոր Յիսուս կը սիրէր, բազմա՞ծ էր Յիսուսի կողքին: Սիմոն Պետրոս նշան ըրաւ անոր՝ հարցնելու թէ որո՞ւն համար կ'ըսէ:

Այդ աշակերտը Յիսուսի կողմը դառնալով՝ հարցուց.

- \*Տէ՛ր, ո՞վ է:

Յիսուս պատասխանեց.

- Պատառը թաթխելով որո՞ւն որ տամ՝ ան է:

Եւ պատառը թաթխելով տուաւ Իսկարիոտացի Յուդային: Յուդա հազիւ պատառը առած՝ Սատանան իր մէջ մտաւ: Յիսուս ըսաւ անոր.

- Ինչ որ պիտի ընես՝ շուտով ըրէ:

Սեղանին շուրջ նստողներէն ո՛չ ոք հասկցաւ, թէ ինչո՞ւ այս խօսքը ըսաւ անոր: Եւ որովհետեւ Յուդայի մօտ կը գտնուէր գանձանակը, աշակերտներէն ոմանք կարծեցին՝ թէ Յիսուս անոր ըսաւ. «Գնա՛ եւ տօնին առիթով ինչ որ մեզի պէտք է՝ գնէ, եւ կամ աղքատներուն բան մը տուր»:

Յուդա պատառը առնելէ ետք՝ անմիջապէս դուրս ելաւ: Եւ գիշեր էր:

Յուդայի մեկնելէն ետք, Յիսուս ըսաւ.

- Այժմ փառաւորուեցաւ \*Մարդու Որդին եւ Աստուած փառաւորուեցաւ անով: Եւ եթէ Աստուած փառաւորուեցաւ անով, Աստուած ալ զայն պիտի

փառաւորէ իրմով. եւ շուտով պիտի փառաւորէ զայն:  
Որդեակնէ՛ր, կարճ ժամանակ մըն ալ ձեզի հետ եմ.  
պիտի փնտռէք զիս: Եւ ինչպէս որ Հրեայ ղեկավարներուն  
ըսի՝ ձեզի ալ կ'ըսեմ. «Հոն՝ ուր ես կ'երթամ, դուք չէք  
կրնար գալ»: Նոր պատուիրան մը կու տամ ձեզի.-  
Միրեցէ՛ք իրար: Ինչպէս ես ձեզ սիրեցի՝ դուք ալ իրար  
սիրեցէք: Ձեր իրար սիրելով է որ մարդիկ պիտի գիտնան,  
թէ դուք իմ \*աշակերտներս էք:

- Տէ՛ր, ո՞ւր կ'երթաս,- հարցուց Սիմոն Պետրոս:

Յիսուս պատասխանեց.

- Հոն՝ ուր ես կ'երթամ, այժմ չես կրնար գալ, բայց յետոյ  
պիտի գաս ետեւէս:

Պետրոս ըսաւ.

- Տէ՛ր, ինչո՞ւ հիմա չեմ կրնար հետեւիլ քեզի: Կեանքս  
անգամ կը զոհեմ քեզի համար:

Յիսուս պատասխանեց.

- Կեա՞նքդ պիտի զոհես ինձի համար: Լա՛ւ գիտցիր, որ  
աքաղաղը չկանչած՝ դուն երեք անգամ պիտի ուրանաս  
զիս:

Ապա Յիսուս ըսաւ իր աշակերտներուն.

- Թող չխռովին ձեր սիրտերը: Հաւատացէ՛ք Աստուծոյ,  
հաւատացէ՛ք նաեւ ինձի: Հօրս տան մէջ շատ օթեւաններ  
կան. եթէ այդպէս չըլլար՝ չէի ըսեր ձեզի, թէ կ'երթամ եւ  
ձեզի համար տեղ կը պատրաստեմ: Եւ երբ երթամ եւ  
ձեզի համար տեղ պատրաստեմ, դարձեալ պիտի գամ եւ  
ձեզ քովս առնեմ, որպէսզի ըլլաք հոն՝ ուր ես կը գտնուիմ:  
Եւ դուք գիտէք թէ ո՞ւր կ'երթամ եւ անոր ճամբան ալ  
գիտէք:

## Բ. ԱԲԵՏԱՐԱՆ

Ղուկասի Համաձայն (22:7-30)

Մեր Տէրը Յիսուս Քրիստոս՝

Եկաւ Բաղարջակերաց օրը, երբ պէտք էր որ Չատիկին համար գառնուկը մորթուէր: Յիսուս Պետրոսն ու Յովհաննէսը դրկեց՝ պատուիրելով. - Գացէք եւ գատկական ընթրիքը պատրաստեցէք, որպէսզի ուտենք: Անոնք հարցուցին.

- Ո՞ւր կ'ուզես որ ընթրիքը պատրաստենք:

Յիսուս ըսաւ. - Հազիւ քաղաք մտած՝ մարդու մը պիտի հանդիպիք, որ ջուրի սափոր մը շակած է: Հետեւեցէ՛ք անոր եւ մտէք այն տունը ուր ինք կը մտնէ, եւ տանտիրոջ ըսէք.

«Վարդապետը կ'ըսէ, թէ ո՛ւր է սենեակը ուր ես աշակերտներուս հետ գատկական ընթրիքը պիտի ուտեմ»: Անիկա վերնայարկը մեծ եւ կահաւորուած սենեակ մը ցոյց պիտի տայ ձեզի: Հոն պատրաստեցէք ընթրիքը: Անոնք գացին եւ ամէն ինչ գտան Յիսուսի ըսածին պէս եւ պատրաստեցին գատկական ընթրիքը:

Երբ ժամը հասաւ, Յիսուս տասներկու առաքեալներուն հետ սեղան բազմեցաւ, եւ ըսաւ անոնց. - Շատ փափաքեցայ գատկական այս ընթրիքը ձեզի հետ ընել չարչարուելէս առաջ: Բայց կ'ըսեմ ձեզի, թէ այլեւս ասկէ պիտի չուտեմ, մինչեւ որ ճշմարիտ Չատիկը կատարուի \*Աստուծոյ արքայութեան մէջ:

Ապա գինիի բաժակը առաւ, շնորհակալութիւն յայտնեց Աստուծոյ եւ ըսաւ. - Առէ՛ք ասիկա եւ իրարու փոխանցեցէ՛ք՝

խմելով ասկէ: Կ'ըսեմ ձեզի, թէ ասկէ ետք գինի պիտի չխմեմ,  
մինչեւ Աստուծոյ արքայութիւնը գայ:

Ապա հաց առաւ, շնորհակալութիւն յայտնեց Աստուծոյ,  
կտրեց եւ աշակերտներուն տուաւ, ըսելով. - Ասիկա  
մարմինս է, որ ձեզի համար տրուած է: Ասիկա կատարեցէք  
իմ յիշատակիս համար:

Նոյնպէս, ընթրիքէն ետք, բաժակն ալ առաւ եւ ըսաւ.

- Այս բաժակը Աստուծոյ նոր ուխտն է, կնքուած իմ  
արիւնովս, որ ձեզի համար կը հոսի: Բայց ահա զիս  
մատնողը ինձի հետ սեղան նստած է: Ճիշդ է որ Մարդու  
Որդին պիտի մեռնի՝ ինչպէս որ Աստուած սահմանած է,  
բայց վա՛յ այն մարդուն որ զայն կը մատնէ:

Անոնք սկսան իրարու հարցնել թէ իրենցմէ ո՛վ պիտի ընէ  
ատիկա:

Աշակերտներուն մէջ վէճ ծագեցաւ թէ իրենցմէ ո՛վ պիտի  
նկատուի մեծը: Յիսուս անոնց ըսաւ. - Ազգերու

թագաւորները կը տիրեն իրենց ժողովուրդներուն վրայ եւ  
իշխողները բարերար կը կոչուին իրենց հպատակներուն  
կողմէ: Բայց ձեր պարագային այդպէս պէտք չէ ըլլայ:

Ընդհակառակը, ձեր մէջէն ամենէն մեծը թող ամենէն  
պզտիկին պէս ըլլայ, եւ առաջնորդը՝ սպասաւորին պէս: Ո՞վ է  
մեծը. սեղան բազմո՞ղը թէ սպասաւորը: Անշուշտ որ սեղան  
բազմողը: Բայց ես ձեր մէջ սպասաւորի պէս եմ: Դուք միշտ  
քովս մնացիք փորձութիւններուս ընթացքին, եւ ես ահա կը  
խոստանամ թագաւորութիւն տալ ձեզի, ինչպէս Հայրս ինձի  
տալ խոստացաւ: Իմ թագաւորութեանս մէջ իմ սեղանէս  
պիտի ուտէք ու խմէք եւ պիտի բազմիք գահերու վրայ՝  
դատելու համար Իսրայէլի տասներկու ցեղերը:

## Գ. ԱԻԵՏԱՐԱՆ

Մարկոսի Համաձայն (14:32-41)

Վասն Մատնութեան Տեառն Մերոյ Յիսուսի Քրիստոսի

Եկան տեղ մը, որ կը կոչուէր Գեթսեմանի: Յիսուս իր աշակերտներուն ըսաւ.

- Հո՛ւս նստեցէք, մինչեւ որ ես աղօթեմ:

Եւ իր հետ առաւ Պետրոսը, Յակոբոսն ու Յովհաննէսը: Խռոված էր ու կը տագնապէր: Այն ատեն ըսաւ անոնց.

- Հոգիս մեռնելու աստիճան տրտմած է. հո՛ւս կեցէք եւ արթո՛ւն մնացէք:

Ապա քիչ մը առաջ գնաց եւ երեսին վրայ գետին փռուելով կ'աղօթէր, որ եթէ կարելի է՝ հեռանայ իրմէ տառապանքի այս ժամը: Եւ ըսաւ. - Հայր, հայր, քեզի համար ամէն ինչ կարելի է: Այս բաժակը հեռացո՛ւր ինձմէ, բայց ո՛չ թէ ինչպէս որ ես կ'ուզեմ, այլ ինչպէս որ դո՛ւն կ'ուզես:

Յետոյ եկաւ եւ տեսաւ որ երեք աշակերտները կը քնանային:

Պետրոսի ըսաւ. - Միմո՛ն, կը քնանա՛ս, չկրցա՛ր ժամ մը արթուն մնալ: Արթուն մնացէք եւ աղօթեցէ՛ք, որպէսզի փորձութեան մէջ չիյնաք: Հոգին յօժար կրնայ ըլլալ, բայց մարմինը տկար է:

Կրկին գնաց աղօթելու եւ նոյն խօսքերը ըսաւ: Եւ երբ վերադարձաւ՝ զանոնք քնացած գտաւ: Անոնց աչքերը չէին բացուէր եւ չէին գիտեր թէ ի՛նչ պատասխան տային անոր: Երրորդ անգամ երբ Յիսուս դարձաւ, ըսաւ անոնց. - Ասկէ ետք քնացէք եւ հանգստացէք: Բայց բաւակա՛ն է, ժամը հասաւ եւ ահա Մարդու Որդին մեղաւոր մարդոց ձեռքը

պիտի յանձնուի: Օ՛ն, ելէք երթա՛նք, որովհետեւ զիս  
մատնողը ահա մօտեցաւ:

## Դ. ԱԲԵՏԱՐԱՆ

Մատթեոսի Համաձայն (26:47-56)

Վասն Մատնութեան Տեառն Մերոյ Յիսուսի Քրիստոսի

Տակաւին կը խօսէր, երբ ահա եկաւ Յուդան՝ տասներկու աշակերտներէն մէկը: Իրեն հետ էր սուրերով եւ բիրերով զինուած մեծ ամբոխ մը՝ աւագ քահանաներուն եւ ժողովուրդի երէցներուն կողմէ ղրկուած: Յիսուսը մատնողը անոնց նշան տուած էր, ըսելով. - Ով որ համբուրեմ՝ անիկա է Յիսուսը, ձերբակալեցէ՛ք զայն:

Յուդա շուտով մօտեցաւ Յիսուսի եւ ըսաւ. - Ողջո՛յն, Վարդապէ՛տ,- եւ համբուրեց զայն:

Յիսուս ըսաւ անոր.- Բարեկա՛մ, ասոր համա՛ր եկար: Ապա մօտեցան, բռնեցին Յիսուսը եւ ձերբակալեցին: Եւ ահա Յիսուսի հետ եղողներէն մէկը ձեռքը երկարեց եւ սուրը քաշելով՝ զարկաւ Քահանայապետին ծառային եւ անոր ականջը կտրեց: Յիսուս ըսաւ անոր. - Սուրդ տեղը դիր, որովհետեւ ո՛վ որ սուր կ'առնէ՝ սուրով պիտի մեռնի: Կը կարծես թէ չե՛մ կրնար Հօրս աղաչել, որ հիմա աւելի քան տասներկու գունդ հրեշտակ ղրկէ ինձի: Սակայն ինչպէ՛ս պիտի իրականանան Սուրբ գիրքերուն մէջ գրուածները, թէ այսպէս պէտք է ըլլայ:

Ապա Յիսուս ամբոխին դառնալով ըսաւ. - Աւագա՛կ եմ որ այդպէս սուրերով եւ բիրերով վրաս կը յարձակիք՝ զիս ձերբակալելու համար: Ամէն օր ձեզի հետ տաճարին մէջ կը նստէի եւ կ'ուսուցանէի ու չձերբակալեցիք զիս: Բայց այս

բոլորը կը պատահին, որպէսզի Սուրբ գիրքերուն մէջ  
մարգարէներուն ըսածները իրականանան:  
Այն ատեն աշակերտները բոլորն ալ ձգեցին զինք ու  
փախան:



## Ե. ԱԲԵՏԱՐԱՆ

Մատթեոսի Համաձայն (26:57-68)

Մեր Տերը Յիսուս Քրիստոս՝

Անոնք ձերբակալեցին Յիսուսը եւ տարին Կայիափա Քահանայապետին տունը, ուր Օրէնքի ուսուցիչները եւ երէցները հաւաքուած էին: Պետրոս հեռուէն կը հետեւէր Յիսուսի, մինչեւ Քահանայապետին տան գաւիթը, ուր մտնելով նստաւ սպասաւորներուն հետ՝ տեսնելու համար թէ վերջը ի՛նչ պիտի ըլլայ: Մինչ այդ, աւագ քահանաները եւ ամբողջ Ատեանը կը ջանային Յիսուսի դէմ սուտ վկայութիւն գտնել, որպէսզի զայն սպաննեն: Բայց չգտան, հակառակ անոր որ շատ մը սուտ վկաներ ալ եկան: Ի վերջոյ՝ երկու սուտ վկաներ եկան եւ ըսին. - Այս մարդը կ'ըսէր. «Ես կրնամ Աստուծոյ \*տաճարը քանդել եւ երեք օրէն շինել զայն»:

Քահանայապետը ոտքի ելաւ եւ հարցուց Յիսուսի. - Քեզի դէմ եղած այս ամբաստանութիւններուն պատասխան մը պիտի չտա՞ս:

Բայց Յիսուս լուռ կը մնար: Քահանայապետը դարձեալ հարցուց Յիսուսի. - Կենդանի Աստուծոյ անունով՝ ըսէ՛ մեզի թէ դո՛ւն ես Քրիստոսը, Աստուծոյ Որդին:

Յիսուս պատասխանեց. - Դո՛ւն կ'ըսես: Բայց կ'ըսեմ ձեզի.- Ասկէ ետք պիտի տեսնէք Մարդու Որդին՝ ամենազօր Աստուծոյ աջ կողմը նստած. եւ պիտի տեսնէք որ կու գայ երկինքի ամպերուն մէջէն:

Ասոր վրայ Քահանայապետը իր վերաբերումն պատռեց եւ  
ըսաւ. - Հայիոյեց. ալ ի՞նչ պէտք ունինք վկաներու. ահա  
հիմա լսեցինք ըրած հայիոյութիւնը: Ի՞նչ կը մտածէք:

Անոնք պատասխանեցին. - Մահապարտ է:

Ապա սկսան թքնել անոր երեսին եւ ծեծեցին զայն. ոմանք  
կ'ապտակէին զինք ու կը հարցնէին. - Զրիստո՛ս, զիտցի՛ր,  
ո՞վ է քեզի զարնողը:

## Չ. ԱԲԵՏԱՐԱՆ

Յովհաննէսի Համաձայն (18:15-27)

Մեր Տէրը Յիսուս Քրիստոս՝

Միմոն Պետրոս եւ ուրիշ աշակերտ մը կ'երթային Յիսուսի ետեւէն: Այս աշակերտը ծանօթ ըլլալով Քահանայապետին՝ Յիսուսի հետ Քահանայապետին տան գաւիթը մտաւ, մինչ Պետրոս դուրսը՝ դրան քով կեցաւ: Միւս աշակերտը, որ ծանօթ էր Քահանայապետին, դուրս ելաւ եւ խօսելէ ետք դռնապանին հետ, որ կին մըն էր, ներս առաւ Պետրոսը: Դռնապան աղախինը հարցուց Պետրոսի.- Արդեօք դուն ալ այդ մարդուն աշակերտներէն չե՞ս:

- Ո՛չ,- պատասխանեց Պետրոս:

Օդը ցուրտ ըլլալուն, ծառաները եւ սպասաւորները կրակ վառած էին հոն ու կը տաքնային: Պետրոս ալ անոնց քով կեցած էր ու կը տաքնար:

Քահանայապետը հարցումներ ըրաւ Յիսուսի՝ անոր աշակերտներուն եւ ուսուցումներուն մասին: Յիսուս պատասխանեց. - Ես հրապարակաւ խօսեցայ բոլորին, ամէն ատեն սորվեցուցի ժողովարաններու եւ տաճարին մէջ, ուր բոլոր Հրեաները կը հաւաքուէին. ես գաղտնի բան բնաւ չեմ խօսած: Ինչո՞ւ կը հարցնես ինձի, հարցուր անոնց՝ որոնք լսեցին թէ ի՛նչ ըսի իրենց. ահա անոնք գիտեն թէ ինչ խօսած եմ:

Յիսուս հազիւ այս խօսքերը ըսած՝ սպասաւորներէն մէկը, որ հոն կեցած էր, ապտակ մը զարկաւ Յիսուսի, ըսելով.

- Այդպէ՛ս կը պատասխանես Քահանայապետին:

Յիսուս ըսաւ անոր.- Եթէ սիսալ բան մը խօսեցայ՝ ցոյց տուր սիսալը. իսկ եթէ շիտակ է ըսածս՝ ինչո՞ւ կը զարնես ինծի:

Յետոյ Հաննա՝ Յիսուսը կապուած վիճակով դրկեց

Կայիափա Քահանայապետին:

Մինչ Սիմոն Պետրոս հոն կեցած էր ու կը տաքնար, հարցուցին իրեն. - Արդեօք դուն ալ անոր \*աշակերտներէն չե՞ս:

Անիկա ուրացաւ եւ պատասխանեց. - Ո՛չ:

Քահանայապետին ծառաներէն մէկը, ազգականը անոր՝ որուն ականջը Պետրոս կտրած էր, ըսաւ. - Ես քեզ չտեսա՞յ ինն՝ պարտէզին մէջ, անոր հետ:

Պետրոս դարձեալ ուրացաւ. եւ իսկոյն աքաղաղը կանչեց:

## Է. ԱԲԵՏԱՐԱՆ

Յովհաննէսի Համաձայն (18:28-19:6)

Մեր Տէրը Յիսուս Քրիստոս

Կայիափայի տունէն Յիսուսը տարին կառավարիչին պալատը: Առաւօտ կանուխ էր: Հրեաները պալատ չմտան, որպէսզի իրենց Օրէնքին համաձայն չպղծուին եւ կարենան զատկական ընթրիքը ուտել: Ուստի Պիղատոս դուրս ելաւ եւ հարցուց. - Ի՞նչ բանով կ'ամբաստանէք այս մարդը:

Անոնք պատասխանեցին. - Եթէ այս մարդը չարագործ չլլար՝ քեզի չէինք յանձներ զայն:

Պիղատոս ըսաւ. - Ուրեմն առէք եւ ձեր Օրէնքին համաձայն դատեցէք զայն:

Անոնք պատասխանեցին. - Մենք իրաւունք չունինք ունէ մէկը մահուան դատապարտելու:

Այսպիսով կ'իրականանար Յիսուսի խօսքը, որով կ'ակնարկէր՝ թէ ի՛նչպիսի մահով ինք պիտի մեռնէր:

Պիղատոս կրկին պալատ մտաւ, կանչեց Յիսուսը եւ հարցուց.- Դո՞ւն ես Հրեաներուն թագաւորը:

Յիսուս պատասխանեց.- Այդ հարցումը դուն քեզմէ՞ կ'ընես, թէ ուրիշներ ըսին քեզի իմ մասին:

Պիղատոս ըսաւ.- Ինչու ե՞ս ալ Հրեայ եմ: Քու ժողովուրդդ եւ աւագ քահանաները քեզ յանձնեցին ինձի: Ի՞նչ ըրած ես դուն:

Յիսուս պատասխանեց.- Իմ թագաւորութիւնս այս աշխարհէն չէ: Եթէ իմ թագաւորութիւնս այս աշխարհէն ըլլար՝ անշուշտ հետեւորդներս պիտի կռուէին, որպէսզի

Հրեաներուն ձեռքը չիյնամ: Բայց ո՛չ, իմ թագաւորութիւնս  
այստեղէն չէ:

Պիղատոս ըսաւ.- Այդպէս ուրեմն, թագաւո՞ր ես:

Յիսուս պատասխանեց.

- Ահա դո՛ւն ես ըսողը որ թագաւոր եմ: Ես ծնած եւ աշխարհ  
եկած եմ մէկ բանի համար, որպէսզի վկայեմ

ճշմարտութեան: Ով որ կողմնակից է ճշմարտութեան՝  
անիկա իմ խօսքս կը լսէ:

Պիղատոս հարցուց.- Ի՞նչ է ճշմարտութիւնը: Ասիկա ըսելէ  
ետք՝ Պիղատոս կրկին դուրս ելաւ Հրեաներուն մօտ եւ ըսաւ  
անոնց.

- Այս մարդուն վրայ ոեւէ յանցանք չեմ գտներ: Բայց ձեր  
սովորութեան համաձայն, ամէն Չատիկի տօնին  
բանտարկեալ մը ազատ կ'արձակեն ձեզի: Արդ, կ'ուզէ՞ք որ  
Հրեաներու թագաւորը ազատ արձակեն ձեզի:

Բոլորը միասին աղաղակեցին.

- Ո՛չ զինք, այլ՝ Բարաբբա՛ն:

Եւ Բարաբբան աւագակ մըն էր:

Պիղատոս առաւ Յիսուսը եւ զայն մտրակով ծեծել տուաւ:  
Չինուորները փուշէ պսակ մը շինեցին եւ դրին անոր գլխուն  
եւ ապա ծիրանի զգեստ հագցուցին անոր: Անոնք իրեն կու  
գային ու կ'ըսէին.- Ողջո՛յն, Հրեաներու թագաւոր:

Եւ կ'ապտակէին զինք:

Պիղատոս դարձեալ դուրս ելաւ եւ ըսաւ ամբոխին.- Ահա  
դուրս կը բերեմ զայն ձեզի, որպէսզի գիտնաք՝ թէ ես ոեւէ  
յանցանք չեմ գտներ անոր վրայ:

Եւ Յիսուս դուրս ելաւ՝ փուշէ պսակը գլխուն եւ ծիրանի զգեստը՝ վրան: Պիղատոս ըսաւ անոնց.- Ահա՛ ձեր մարդը ձեզի:

Երբ աւագ քահանաները եւ սպասաւորները տեսան զինք, բարձրաձայն աղաղակեցին.- Խա՛չը հանէ, խա՛չը հանէ զայն: Պիղատոս ըսաւ.- Այն ատեն՝ դո՛ւք առէք եւ ձեր ձեռքով խաչը հանեցէք, որովհետեւ ես ոեւէ յանցանք չեմ գտներ իր վրայ:

- Մենք Օրէնք ունինք,- վրայ բերին Հրեայ ղեկավարները,- եւ մեր Օրէնքին համաձայն պէտք է մեռնի, որովհետեւ ինքզինք Աստուծոյ Որդի ըրաւ:

Պիղատոս ասիկա որ լսեց, ա՛լ աւելի վախցաւ: Կրկին պալատ մտաւ եւ հարցուց Յիսուսի.- Ուրկէ՞ ես դուն:

Բայց Յիսուս չպատասխանեց: Պիղատոս ըսաւ անոր.

- Չե՛ս խօսիր ինձի հետ. չե՛ս գիտեր՝ թէ իշխանութիւն ունիմ քեզ խաչը հանելու, ինչպէս նաեւ՝ քեզ ազատ արձակելու: Յիսուս պատասխանեց.- Իմ վրաս ո՛չ մէկ իշխանութիւն պիտի ունենայիր՝ եթէ քեզի վերէն՝ Աստուծմէ տրուած չլլար: Հետեւաբար մեծ մեղքը անորն է՝ որ զիս քեզի յանձնեց:

Այս խօսքին վրայ՝ Պիղատոս կերպ մը կը փնտռէր, որ ազատ արձակէ Յիսուսը, բայց Հրեայ ղեկավարները կ'աղաղակէին.

- Եթէ ազատ արձակես՝ կայսրին բարեկամ չես: Ով որ ինքզինք թագաւոր կը կոչէ՝ հակառակ է կայսրին:

Երբ Պիղատոս այս խօսքերը լսեց, դուրս հանեց Յիսուսը եւ ատեան նստաւ, այն տեղը՝ որ Քարայատակ կը կոչուէր, Եբրայերէն՝ Կապապթա: Չատիկի նախորդ օրն էր,

Կէսօրուան մօտ: Պիղատոս ըսաւ ամբողջին.- Ահա՛ ձեր  
թագաւորը ձեզի:

Բայց անոնք աղաղակեցին.- Սպաննէ՛ զայն, սպաննէ՛ զայն.  
զինք խա՛չը հանէ:

Պիղատոս հարցուց.- Ձեր թագաւորը խա՛չը հանեմ:

Աւագ քահանաները պատասխանեցին.- Մենք կայսրէն զատ  
ուրիշ թագաւոր չունի՛նք:

Այն ատեն Պիղատոս Յիսուսը անոնց ձեռքը յանձնեց,  
որպէսզի խաչուի: